

**■ COLUMNA**

# Umens èn auter – dunnas era!

DA MARIA CADRUVI

**T**gi ha inventà la roda? E tgi ha inventà la pulvra? Umens! Umens fan da questas chaussas. Sche umens san far ina lavur cun x in vehichel ubain cun x ina maschina, lura èn els beads. Enstagl da purtar cun lur mauns diesch lains dad A tar B organischeschan els pli gugent ina charretta per als transportar, era sche la distanza è mo 50 meters e sch'els dovran l'emprim mes'ura per insumma vegnir tar ina charretta. Forsa èsi l'uffant en l'um ch'ha plaschair da traffitgar cun insatge mechanic. Lavur e gieu daventan sinonims. In bellezza exempel sin quest champ èn las invenziuns che Stefan Heuss preschenta regularmain tar Giacobbo/Müller. Tipic um!?

**I**gl è divertaivel dad observar co umens èn – e co dunnas èn. Munds in ord l'auter! Natiralmain ch'i dat era grondas differenzas tranter umens ed umens e tranter dunnas e dunnas. Ma sch'ins fa ina differenza tranter las schlat-tainas sche discurren blers oz da «tipic» tar circa 80%. 80% dals umens han plaschair da rodas e maschinas e 20% dals umens interes-sescha quai ina pipa tubac. 80% da las dunnas han plaschair da lungs discurs al



telefon e 20% da las dunnas fan pli gugent curt. Mintga dunna e mintga um sa tutgar en ina dome-na tar ils 80% ed en in'au-tra tar ils 20%. I dat pia per tuts anc bler spazi cun potenzial da svilup.

**J**au savess per exempel anc ma meglierar puncto lunghezza da telefons. Sch'jau dun in clom la dumengia saira ad ina da mias soras sche cuzza il discurs darar damain che ventg minutas. U in auter exempel: sch'jau hai il sentiment ch'ina chaussa na saja betg anc reglada u liquidada, lura sun jau el cas dad insister ch'i vegnia discurrì anc ina giada surlonder. Tipic dunna!?

**L**ain prender ils umens e l'auto! I na dat strusch ina meglra domena che mussa il vair esser masculin, quel esser che vul sa mussar, far impressiun, manischar e sa mesirar. Jau en-

conusch in um ch'è en general la paschaivladad senza, perfin davos la roda, al-main uschè ditg ch'el è sullet sin via. Ma uschespert ch'el vesa avant el in auter auto sa sveglia en el insatge remarchabel. El charrescha pli e pli spert e guarda da vegnir uschè datiers sco pussaivel da lez auto. Per savair leger ils tatgaders dasper il numer? Per al surpassar u vargar? Jau na sai betg. En da quests muments stoss jau capitular. E lura ma va in da mes buns collegas da pli baud tras il chau. Quel aveva per moda da dir: dunnas ston ins laschar far. Ed jau al respundeva: umens era.

**I**l tema da las differenzas tranter um e dunna, tranter Mars e Venus è vegl. Per ordinari ans occupain nus cun ils 80% che correspundan al cliché. Nus emblidain ils 20% «minoritars» ch'èn apparentamain atipics. Igl è sorprendent da scuvrir nua ch'ins tutga sez tar las minoritads. Qua dat-ti dal rest adina puspè surpraisas, tar ins sez e tar ils auters. Perquai n'èsi gnanc uschè segir ch'ils umens han inventà la roda e la pulvra. Forsa èsi tuttina stà las dunnas, quellas che tutgavan gia lezza giada tar ils 20% ch'eran in pau auter.

maria.cadruvi@spin.ch